

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 475954 24 St
Tuzla, 29.07.2025. godine

OPĆINSKI SUD U TUZLI, sudija Vedran Milašinović razmatrajući prijedlog predlagača stečajnog dužnika „Rajska Gradnja“ d.o.o. za građevinarstvo, trgovinu i usluge Gradačac, Rajska b.b., van ročišta donio je dana 29.07.2025. godine sljedeće:

R J E Š E N J E

JAVNO SE POZIVAJU predlagač, povjerioci i sva zainteresovana lica da u roku od 30 (trideset) dana od dana objavljivanja rješenja u Službenim novinama F BiH predlože otvaranje stečajnog postupka i na žiro-račun Suda, broj: 132-100-03091233-91 NLB banka dd Sarajevo, predujme iznos od 3.195,92 KM (trihiljadejednostotindevedesetpetkonvertibilnihmaraka 92/100), na ime obezbjeđenja troškova stečajnog postupka, te da dokaz o izvršenoj uplati dostave sudu pozivom na broj predmeta.

Ukoliko stečajni dužnik kao predlagač ili neko od zainteresovanih lica ne uplati navedeni iznos predujma u ostavljenom roku uz dostavu dokaza o uplati sudu pozivom na broj predmeta, sud će o prijedlogu za otvaranje stečajnog postupka odlučiti u skladu sa odredbama Zakona o stečaju.

Rješenje će biti objavljeno u Službenim novinama F BiH, web stranci suda i oglasnoj ploči suda.

O b r a z l o ž e n j e

Sud je dana 28.03.2025. godine pokrenuo prethodni postupak radi utvrđivanja uslova za otvaranje stečajnog postupka nad imovinom privrednog društva „Rajska Gradnja“ d.o.o. za građevinarstvo, trgovinu i usluge Gradačac, Rajska b.b., a za privremenog stečajnog upravnika imenovan je Hazim Huskić iz Gradačca. Dana 19.05.2025. godine privremeni stečajni upravnik je dostavio izvještaj o provedenom prethodnom postupku.

Iz izvještaja privremenog stečajnog upravnika i navoda datih na ročištu proizilazi da je društvo prestalo sa obavljanjem djelatnosti septembra 2023. godine zbog poremećaja na tržištu uzrokovanih pandemijom Corona virusa. Bankovni račun društva je blokiran u kontinuitetu od 24.05.2022. godine. Radnici društva su objavljeni tokom 2023. godine. Iz uvjerenja PU F BiH proizilazi da društvo ima neplaćenih obaveza po osnovu direktnih poreza u iznosu od 33.408,64 KM, a iz uvjerenja UIO BH proizilazi da društvo ima obaveza po osnovu indirektnih poreza u iznosu od 22.540,05 KM. U poslovnim knjigama dužnika su evidentirane kratkoročne obaveze u iznosu od 98.655,00 KM (prema dobavljačima, po uzetim kreditima i sl.), s tim da prema izjavi direktora ovo nije odraz stvarne visine dugovanja jer je dio duga izmirio iz lične imovine, tako da bi se tačan iznos obaveza mogao utvrditi tek po otvaranju stečajnog postupka na osnovu prijave potraživanja. Stečajni dužnik u svom vlasništvu nema nepokretnosti, osnovnih sredstava, repromaterijala, zaliha, novčanih sredstava. Od imovine koja bi mogla činiti stečajnu masu društvo posjeduje dva motorna vozila i to; putnički kombi marke Volkswagen, reg. oz. K64-T-611, godina proizvodnje 1990, i teretni kombi marke Volkswagen, reg. oz. T98-J-885, godina proizvodnje 1999., na kojima kod MUP-a TK postoji evidentirana zabrana otuđenja po nalogu UIO BH. U prethodnom postupku je izvršena procjena vrijednosti ovih vozila od strane ovlaštenog procjenitelja Adila Bašića koji je vrijednost putnički kombi marke Volkswagen, reg. oz. K64-T-611, godina proizvodnje 1990 procijenio u visini od 609,28 KM, a vrijednost teretni kombi marke Volkswagen, reg. oz. T98-J-885, godina proizvodnje 1999 u visini od 2.704,80 KM, što zbirno daje iznos od 3.304,08 KM, a ukoliko bi se vrijednost posmatrala kao cijena sekundarnih sirovina (u slučaju unovčenja po ubrzanoj likvidacionoj prodaji) ista bi zbirno za oba vozila iznosila 1.024,50 KM.

Provjerama u registru zalogi kod Ministarstva pravde BiH utvrđeno je da za navedena vozila nisu registrovani zalozi.

Stečajni dužnik a što proizilazi iz izvještaja i mišljenja privremenog stečajnog upravnika je u roku od 60 dana od dana nastupanja platežne nesposobnosti podnio prijedlog za otvaranje stečajnog postupka (prijedlog podnesen 11.12.2024. godine, a bankovni račun blokiran 24.05.2022. godine).

Ispitujući prijedlog za pokretanje stečajnog postupka sud je utvrdio da je prijedlog za otvaranje stečajnog postupka dopušten i osnovan obzirom da je stečajni dužnik platežno nesposoban.

Što se tiče trećeg uslova za otvaranje stečajnog postupka odnosno, da li dužnik ima imovine dovoljne za pokriće troškova otvaranja i vođenja stečajnog postupka privremeni stečajni upravnik je dostavio specifikaciju troškova potrebnih za otvaranje postupka i vođenje do ispitnog i izvještajnog ročišta u visini od 7.130,00 KM, a koja specifikacija je iskazana u dijelu II točka 5 izvještaja. Pod pretpostavkom unovčenja dva motorna vozila po procijenjenoj vrijednosti po višoj varijanti u iznosu od 3.314,08 KM, te kada se uzme u obzir iznos sredstava od 620,00 KM koji je preostao iz prethodnog postupka, to bi razlika do visine minimalnih troškova za otvaranje i vođenje postupka iznosila 3.195,92 KM.

Cijeneći da su ispunjeni uslovi za otvaranje stečajnog postupka, a nakon provedenog prethodnog postupka i dostavljenog izvještaja privremenog stečajnog upravnika, te da je utvrđeno da stečajni dužnik nema dovoljno imovine za podmirenje troškova postupka u cijelosti, sud je u smislu odredbe čl. 102 stav 7. Zakona o stečaju pozvao dužnika, povjerioci i sva zainteresovana lica da izvrši uplatu troškova finansiranja stečajnog postupka u visini od 3.195,92 KM iz kojih sredstava će biti finansirani preostali troškovi stečajnog postupka (nagrada i naknada stečajnom upravniku, objavljivanje rješenja u službenim novinama, izrada pečata za društvo u stečaju, računovodstvene usluge, podnošenja finasijskih izvještaja nadležnim institucijama sve do postupka brisanja društva dužnika iz sudskog registra privrednih društava, procjena imovine odstrane ovlaštenih vještaka, objava oglasa za unovčenje imovine i drugo).

Ukoliko predlagač, povjerioci ili neko od zainteresovanih lica u ostavljenom roku ne predlože otvaranje stečajnog postupka i izvrše uplatu predujma troškova za vođenje stečajnog postupka, sud će otvoriti stečajni postupak i odmah ga zaključiti u skladu sa odredbama člana 102.stav 8. Zakona o stečaju.

Odluka o dostavi rješenja i javnom oglašavanju putem oglasne ploče suda, WEB stranice Općinskog suda u Tuzli i javnog objavljivanja u Sl. Novina F BiH, zasniva se na odredbi člana 103. stav 8. Zakona o stečaju.

SUDIJA
Vedran Milašinović

POUKA O PRAVNOM LIJEKU: Protiv ovog rješenja nije dozvoljena žalba.